

REGIONAL NEWS

HEADLINES:-

1. Larsap Gen. Vijay Kumar Singh-an February ni 17 atanga tan turin Mizoram state legislative assembly inkhawm a ko.
2. Nikum September ni 13-a Sairanga rel a luh atanga vawiin thleng khan Sairang rel chawlhmunah Inner Line Permit (ILP) 23,001 pek chhuah a ni tawh.
3. Mizorama awm mek Myanmar raltlante mitnaute leh kutze thla endik hna kal mekah za zela 80 thelh hna zawh a nih tawh.
4. Kumina Pariksha Pe Charcha neih tura tel duh zirlai vbch 4 chuang an in ziak lut tawh.

<><><>

ASSEMBLY SESSION

Larsap Gen. Vijay Kumar Singh chuan February ni 17 atanga tan turin Mizoram state legislative assembly inkhawm a ko.

Assembly secretariat hriattirna chhuahin a tarlan danin Larsapin assembly inkhawm a koh hi Assembly pakuana inkhawm vawi 6-na tur a ni dawn a. Tun tum assembly inkhawm lo awm tur hi budget session a ni ang a. Finance changtu Chief Minister Pu Lalduhoma'n ZPM sorkar hnua Mizoram tangka kum khat sum ruahman (state annual budget) a pharh vawi 3-na a ni dawn a ni. Assembly inkhawm ni hmasa ber leh ni dang pawh chawhma dar 10 leh a chanve-a tan tur a ni a. Ni engzat chung nge inkhawm tur tih leh inkhawm hun hman chhoh dan tur chu assembly speaker Pu Lalbiakzama kaihhruai business advisory committee (BAC) thukhawmin an la rel dawn a. Sorkar lamin dan siam tur rawtna leh tihtur dang a chhawp chhuah tam leh tlemah assembly inkhawm neih chung hi a rei-in a rei lo dawn a ni.

Assembly secretariat atanga Akashvani Aizawl News thu a dawn danin Speaker hi a zin dawn avangin BAC thutkhawm hun hi a hla deuh mai thei ni a rin a ni.

<><><>

CHOLERA

Tuihri leng avanga Lawngtlai district leh Myanmar inkalpawhna khar chu hlih a ni ta.

Lawngtlai district magistrate Pu Donny Lalruatsanga chuan tuihri natna leng avanga December ni 23 atanga Lawngtlai district leh Myanmar inrina zawng zawng kharna thupek a lo chhuah tawh chu a hlip a. Hlihna thupek hi nimin atanga hmang tanin ramri hi hawn a ni leh tawh a. Lawngtlai a Lairam Christian Medical Centre & Hospital a tuihri kai mi 8 enkawlte pawh an dam leh vek tawh a, hri kai belh an awm lo bawk a ni. Lawngtlai district-ah hian tuihri leng avangin November thla khan mi 6 an thi a, December thla khan mi 4 thi lehin he district-ah hian nikum kum tawp lama tuihri natna leng vangin mi 10 an thi ani. Hri leng hi a tirah enge a nih hriat a ni mai lova, Zoram Medical College & Hospital laboratory a endik a nih hnu-ah tuihri a ni tih finfiah a ni.

Tuihri len vena tho Siaha district-ah chuan hri leng a zia-awm hma avangin December ni 23 thova ramri khar thupek chhuah chu January ni 4 khan hlih a lo ni tawh a. Siaha district-ah hian November thla khan

tuihri natna avangin mi 3 an thi a. December thla khan hri kai mi 6 an awm leh na a, thi erawh an awm belh tawh loh bakah an vai hian enkawl dam an ni tawh a, hri kai belh report a awm lo bawk a ni.

<><><>

ILP

Nikum September ni 13-a Sairanga rel a luh atanga vawiin thleng khan Sairang rel chawlhmunah Inner Line Permit (ILP) 23,001 pek chhuah a ni tawh.

Sairang Rel Station ILP counter atanga Akashvani Aizawl News thu dawn danin, nikum September ni 13 atanga vawiin January ni 11 thlengin Sairang rel station-ah ILP 23,001 pek chhuah a ni tawh a, nikum September ni 13 atanga December ni 31 thleng khan ILP 20,914 pek chhuah niin, kumin January ni 1 atanga vawiin ni 11 thleng hian 2,087 pek chhuah a ni leh tawh a, heti hian a vaiin ILP 23,001 pek chhuah a ni tawh a ni. Sairang Rel Station-a ILP pe chhuaktute chuan nikhatah rel vawi 2 lo thlen chang leh vawi 1 chauh lo thlen chang a awm an ti a, chawhrualin nitin ILP 160 atanga 170 vel an pe chhuak thin tih an sawi a. Rel rawn luh tan tirh nikum October thla leh November thla inkarah khan ILP an pek tam zawk chu khualzin (tourist) an nih thu leh, tunah chuan inhlawhfa tura lo lut (labour) leh Medical Representative (MR) te chu ILP pek zingah an tam tawh tih an sawi bawk.

ILP pek chhuah zingah Assam atanga lo lut an tam ber a, West Bengal, a bikin Kolkata-in dawtin state dang hrang hrang atanga rawn zin lut pawh an awm reng tih an sawi a, rel hmanga rawn zin lut zingah online kaltlanga ILP la an tam zawk chang a awm tih an sawi bawk.

Sairang Rel Station ILP counter atang hian October thla kha ILP pek chhuah tam ber thla niin, 6,547 pek chhuah a ni a, December thla khan dawtin 5,992 pek chhuah a ni a, November thlaah 5,765 pek chhuah niin, September ni 13 atanga ni 30 thleng khan ILP 2,610 pek chhuah a ni bawk a ni.

<><><>

PRISON

Mizorama jail hrang hrang 11-ah mi tang 1,664 an awm a, lungin a leng zat (jail capacity) aiin mi tang 485 in an tam zawk a ni.

Mizoram prison department in a chhinchhiah danin, nimin January ni 10 thleng khan Mizorama lungin hrang hrang 11 ah mi tang 1,664: mipa 1,466, hmeichhia 185 leh an fate naupang 13 an awm a. Central Jail Aizawlah tang tam berin mi 480 awmna turah mi 843 an tang a, a leng zat aiin 363 in an tam zawk a ni. District Jail Champhai in dawtin, mi 105 lennaah mi 149 an tang a, a leng zat aiin 44 in an tam a, District Jail Aizawlah tang 90 lennaah mi 122 an tang a, a leng zat aiin 32 in an tam a. Women's Jail, Aizawlah mi 96 lennaah mi 127 an tang a, a leng zat aiin 32 in an tam a. District Jail Lungleiah mi tang 109 lennaah mi 123 an tang a, a leng zat aiin 14 in an tam zawk a ni. Hetihlai hian District Jail Saitualah tang pakhatmah an awm lo thung a, District Jail Serchhip, Mamit, Lawngtlai, Kolasib leh Siaha ah te pawh tang leng zat aiin tang an tlem zawk a ni.

Mizoramah dam chhunga a tang tur (lifer) mi 55 an awm mek a ni.

<><><>

MISSIONARY DAY

Vawiin Pathianni hi Mizorama chanchin tha hril tura Pu Buanga leh SapUpa te lo thlen ni champha Missionary Day a ni a, hemi pual hian hun hman a ni.

Missionary Day hi Pathianni-ah a tlak avangin Baptist Church of Mizoram chuan Missionary Day lawm nan nimin tlai khan ruai theh in Kohhran ho ten Pathian fakin hun an hmang ani. BCM hian Pu Buanga leh Sap Upa ten Mizoram a chanchin tha puanga Mizoram Leilung an rawn rahna hmasa ber hi urhsun tak in an lawm thin a, Kohhran Ni pawimawhah an chhiar a ni. Hetih lai hian tun tumah chuan BCM hnuai tualchhung Kohhran engemawzah chuan sum leh paiah harsatna nei a an inhriat avang a ruaitheh lo te pawh an awm a. hriat theih chinah Lunglei khawpui chhunga BCM Kohhran 13 vel chuan ruai thehin Missionary Day hi an lawm a, Kohhran 12 vel chuan ruai an theh lova, vawiin inkhawmbanah thingpui ruai an theh thung a ni.

Mizoram Presbyterian Kohhran pawhin vawiin hi an kohhran din tan ni ah pawmin hun an hmang a, chawhma leh zân hun atân thupui siam niin, nilênga hmang thei chuan kohhran malin mahni remchân anga hun insiam mai turin Synod in a rel a. Chawhnu inkhawmah “Ringtu leh sum enkawl hna” tih thupui hmangin thu chah ngaihthlak ani a, zan inkhawmah “Mizoram Presbyterian Kohhran leh Pathian ram thawhlâwm” tih thupui hmangin thuchah ngaihthlak ani ang.

Kum 2014 Synod Inkhâwmpui chuan, Mizorama Presbyterian Kohhran din kum chu kum 1894 January ni 11 a ni e, tiin a rêl a, kum 2016 Synod Inkhâwmpui chuan Mizoram Presbyterian Kohhran Din Tan Ni hi Synod ni pawimawhah telh ve ni rawh se, tiin a rêl leh a, Synod thu hi Synod Executive Committee (SEC)-in bawh zuiin, kum 2018 atangin Synod calendar-ah telh ni se, Synod holiday-ah pawh telh ni se, tiin a rêl zui a, January 11 hi Mizoram Presbyterian Kohhran Din Tan Ni atân kum tin hman a ni ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BIOMETRIC ENROLMENT

Mizorama awm mek Myanmar raltlante mitnaute leh kutze thla endik hna kal mekah za zela 80 thelh hna zawh a nih tawh.

Home department atanga thudawn danin Krismas leh kum thar vuakvet velah pisa kai hun a tlem hle chungin Myanmar raltlante biometric enrolment kalpui mek chu chhonzawm zel a ni a. Tun Zirtawpni thleng khan raltlan awm mek mi 30,463 zinga mi 24,191 te biometric enrolment tihfel a ni a, hei hi za zela 79 point 41 a ni. Aizawl, Lunglei leh Serchhip district-ah te chuan Myanmar raltlan awm zawng zawngte mitnaute leh kutze thla endik a chhinchhiah vek a ni tawh a. Khawzawl district-ah za zela 94 point 19, Kolasib district-ah za zela 93 point 55 leh Mamit district-ah za zela 90 point 58 zawhfel a ni tawh bawk. Myanmar raltlan tamna ber Champhai district-ah chuan za zela 79 point 31

zawhfel a ni a, raltlan tamna ber dawttu Lawngtlai district-ah erawh za zela 53 point 33 chauh zawhfel a la ni.

Champhai district-ah hian Myanmar raltlan 13,098 an awm mek a, Lawngtlai district-in dawtin raltlan 6,017 an awm a. A pathumna, Aizawl district a raltlan 4,159 te chu biometric enrolment tih zawh vek a ni tawh a ni.

<><><>

PARIKSHA PE CHARCHA 2026

Prime Minister Narendra Modi-a leh zirlaite inkawmhona, Pariksha Pe Charcha 2026 neih turah tel duh zirlai vbch 4 chuang an in ziaik lut tawh a, nikum khan zirlai inziak lut vbch 3 leh nuai 56 awmin Guinness World Record siam a ni a, he record hi kuminah khum a ni leh ta a ni.

Department of School Education & Literacy-in kum tina a buatsaih thin, Pariksha Pe Charcha-ah hian zirlai thlan chhuahte chu Prime Minister nen hmaichhana inkawmhona neiin zirlai kaihhnawih thil dang bakah hahdam taka exam hmachhawn theih dan turte, rilru hrisel neih theih dan turte sawiho thin a ni a, zirlaite bakah zirtirtu leh zirlai nu leh pate pawh an tel thin a ni.

<><><>

INDIANS RESCUED

Hna thawh tur hmuh sak intiama Myanmar ramchhunga bum luh India mi 27 chhanchhuahte chu nimin khan him takin Delhi rawn thlenpui an ni a, an chhunge hnen theuhah thawn haw nghal an ni. Heng India mite hi hna tha tak thawk tura sawm luh an nih hnuah tih luihna-in cyber atanga inbumna thil lama thawk turin Myanmar ramri bul lamah thawn an ni a, nasa takin tih nawmna an ni bawka a ni.

<><><>

WORLD CUP TROPHY UNVEILED

FIFA World Cup 2026 No Mawi chu a duh apian en theih turin ram hrang hrang fanpui mek a ni a, he No Mawi hian ni 3 chhung India fang kual turin nimin khan New Delhi a lo thleng a, Union Sports Minister Mansukh Mandaviya leh Brazilian footballer thin, Gilberto D'silva-ten a khuh hawna an nei a ni.

FIFA World Cup trophy hi Delhi khawpuia ni 2 a awm hnuah Guwahati pan pui a ni ang.

United States, Canada leh Mexico-ten an inthlen tawm tur, World Cup 2026 hi June ni 11-ah tan a ni dawn a, Mexico leh South Africa-ten match hmasa ber, Mexico City-ah khel ang. Tun tum World Cup-ah hian a wawi khat nan team 48 an tel dawn a, heng team-te hi pali zelin group 12-ah then hran an ni.

<><><>